

TXITO Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatanano kãkitimoni Teoso mereëkini auiãkiti sãkiretxiti nisãpiretini ïkapani. Iokanatanano kãkitimoni atão inakari imarotinina ïkapani. Atão inakari imarotiko oerekaua Teoso nireëkiti akamini ïkapani. ² Aãuikari aãuapininiika anini Teosokata, kotxi kitxakapirïka itixi kamiko apisa Teoso kamaenetari ikara. Ininiã apokapitikako, kotxi atãonoka iua sãkire. !Iposotari atão minakati isãpiretini. ³ Iketotiniri manapi oerekari isãkire. Isãkire sãpiretakani sãpiretari isãkire. Ininiã Teoso sãkire notamoni isikakiti nisãpiretai, kotxi Teoso amaerekani makatxakakari paniãtano nota nisãpiretiniri isãkire.

⁴ Niokanatsopata pite Txitomoni. Namarite atão inakari atoko pitxaua, kotxi pite auikari Xesosi sãkire nota auikiniri atokotxikana. Aïri Teoso, aãuïte Xesosi Kristo amaerekani makatxakakari pakini, sikari ikinipoko erekari pitemoni. Ninoa ïamonïkai. Ikamaerekaxiniretaina.

Kõtãkikarerini

⁵ Nitakanapai pite Kreta pokomiriïti, kotxi aparïka iuaãtaã kona xipokapanika, ininiã ninirekari pite kaminiri ikara parïkatxi. Pimereëna kõtãkikarerini ikini sitatxitiã Teoso sãkire auiãkani õtãkikakani tikane. Pimereëna mitxi nisãpiretakiti iaõka. ⁶ Ia atoko inakari kãkiti

pimereë kōtākikarerini ĩkapani: Iua kamari erekari, ĩniniã maerekati auakasaaki, kona iua xikani maerekati apoka. ãtonokara ĩtanoro aua. Imiakori auikari Xesosi sãkire. Ninoa !neenamauata. Ikamarina iri paniãtakiti iaõka.

⁷ Teoso sikari iparĩka kōtākikarerimoni ikamini ĩkapani, ĩniniã kōtākikareri kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanãkarauatini. !Ipoãta. Kona kaneenamari. !Itiretaro txineiro.

⁸ Kōtākikareri atão inakari potxitari apakapiniri kãkiti iua aapoko ãki. Ipotxitari kãkiti erekari kamakani. !Katima omanãkarauatini. Erekari-noka ikama. !Ikamari maerekati. Erekari imarotakiti !itakanapari ikamini. ⁹ Kōtākikareri atão inakari oerekaãkapeka Teoso sãkire. Imarotari Teoso kaminiri isãkire iaõka, ĩniniã iteene ĩñikataru Teoso sãkire. !Imamakari Teoso sãkire. ĩniniãkara imarotari õtãkikiniri apanakini. Iteene imarotari Teoso sãkire, ĩniniã imarotari oerekiniri apanakini Teoso sãkire manirekakani, Teoso sãkire auikinina ĩkapani.

Erepaniko, Atão Minakati Oerekakani

¹⁰ Kaiãopokori kãkiti kona nirekari Teoso nirekiti ikaminina. Maxikatiĩka isãkirauatapika. Kamisirienererini ninoa. Ikara atoko inakani nirekari Teoso takaõtxikare Xoteo minakaniua ĩtoã auini. ¹¹ Matxĩkitakari ninoa iotokakiniri atão minakati isãpiretinina, kotxi kãkiti aapoko ãki auakani naiatakakaua ninoa oerekakiti sãkiretxiti xika. !Apakata ninoa oerekakiti sãkiretxiti. Iuaritika ninoa oerekari atão minakati, txineiro apakapinina ĩkapani. ¹² Ninoa atokirinini kitxakapirĩka, koerekareri, uai Kreta pokomiriĩti

auakarini, txari: “Kreta auakani ātipirika misirienetari kākiti. Maerekati kamakani itxauana. Kaneenamari itopa auakari atoko ikamana. Iarinouatana. Paixonina,” itxa iua.

¹³ Isāpiretakiti atāopitikara. Ininiā pitaparax-inireritika pipinitana ninoa imasāpiretakanirina ikara atāo minakati, Xesosi sākire atāo auikinina ikapani. ¹⁴ Ininiā pisāpiretana: “!Himaākatapiriko Xoteoakori kiomaneakorini sākire atāo minakati. !Himaākatapena atāo inakari manirekaākani paniātakiti.” ¹⁵ Kākiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kākiti imaerekani auapanika inakari, Teoso sākire iaōka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ākixinire, ininiā ākixinire !ōtākikari iua maerekati imakamakani ikapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiā !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireēkiti, ininiā ! iposotarina erekari ikaminina.

2

Txito Ōtākikiko

¹ Ininiā poerekariko ikinika atāo inakari Teoso oerekiko sākiretxiti.

Kiki Aneēkani Ōtākikiko

² Ia atoko pōtākikana kiki aneēkani: “Hīxinikariko hīkamakiti tīkane hīkaminiri apisapanika. Erekari hīkamako apanakini paxitinii ikapani. Kona hīkamapiri hīto nireēkiti. Iteene himarotariko

hãuiãkiti. Iteene hītiraõkiuatako. Katima omanãkarauataka !hĩtxape.” Ikara atoko põtãkikana kiki aneẽkani.

Sito Aneẽkani Ôtãkikiko

³ Ia atoko põtãkikana sito aneẽkani: “Hĩkamariko Teoso pĩkakani kamakiti atoko. Maxikatiĩka ! hãpoĩtapiri ãti. Kona iteene hiãtapiri iãriã kapoãro. Erekarinoka hõerekako.” Ikara atoko põtãkikana ninoa. ⁴ Apaka põtãkikana sito aneẽkani ôtãkikinina ãtokoroakoro ia atoko: “Hĩtiretanako hĩtaniri, hamariteakori pakini. ⁵ Kona hĩkĩpitapiri hiĩto paniãtakiti. Erekarinanira hĩkamako. Hĩkamariko hĩparĩka haãpoko ãki. Erekarĩ hĩkamako apanakini ĩkapani. Hĩtaniri nireẽkiti hĩkamako, ininiã iusaaki Teoso sãkire mauiãkani ! imisãkirepiretari Teoso sãkire.” Ikara atoko sito aneẽkani oerekanako ãtokoroakoro.

Ãtokoriakori Ôtãkikiko

⁶ Ininiã iua atokokana põtãkikana ãtokoriakori ia atoko: “!Apakata hĩkaminiri hiĩto nireẽkiti.”

Txito Ôtãkikiko

⁷ Txito, ikini pikamakiti pikamako kãkiti erekari kamiko imarotini ĩkapani. Poerekarauatakasaaki, poerekari kãkiti pitiretiniri atão inakari sãkiretxitinoka. Poerekanako Teoso sãkirenoka apiari inini. Poerekarauatakasaaki, poerekariko kãkiti pimakoketakaniri atão minakati pisãkirekata. ⁸ Poerekariko atão inakarinoka, ininiã !auari papoĩtiko, kotxi !pikerokari pisãkire. Ikara atoko ininiã, pimokaiakarini pẽtauata, kotxi liposotarina imisãkirepiretinii.

Nitiritxi Amotakoni Ôtãkikiko

⁹ Ia atoko poerekanako nitiritxi amotakoni: “Hĭkĭpitariko hĭpatrāote sākire. Hĭkamariko hĭpatrāote apokaerekatakitinoka. Kapakapaenere !hĭtxape. ¹⁰ !Hĭĭtirĭkapiri hĭpatrāote tii. Hĕerekariko hĭpatrāote pisākire atāo inini. Ininiā hĭpatrāote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekarĭ Teoso Sikakiti

¹¹ Ikinimanemoni Teoso oerekapekari erekari isikakiti kākiti maerekani imakatxakini. ¹² Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri ĭkorapokoriti auakani ĭto nireĕkiti. Teoso sikakiti erekari oerekaua aĭto paniātakiti atakanapini, atāo inakaranoka akamini, Teoso nireĕkiti akamini ĭkorapokoriti aāuakasaaki. ¹³ ĭkorapokoriti aāuakasaaki, aiātapani poxokonitxi ōti Apiananiri aTeosone apokini ōti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ĭkapani ipĭkasaaki. Iuasaaki ĭĭkitxitari Teoso, ininiā Teoso makatxakaua ikinika maerekanitxi sauaki. Ikara atoko ininiā, ikamaerekataua ate. Ininiā itxĭkitakaua inakitiakori aniniua, ininiā anirekari erekari akamini.

¹⁵ Auĭtetxi pininiua atoko pipaniātariko kākiti kĭpitiniri ikara nisāpiretakiti. Pōtākikana nisākire makĭpitakani. Kona pauiritapiri kākiti sāpiretiniri pisākire atāo minakati inini.

3

Teoso Nireĕkiti Kamiko

¹ Txito, ia atoko poerekariko kākiti: “Hīpaxitariko ĩkorapokoriti auñtetxiakori paniātakiti, poiāori auñtetxiakori paniātakiti apaka. Iposope hītxako ikinika erekari hīkamini.

² Kona himisākirepiretapiri apanakini. ! Hineenamauatape. Merepanika hīxinikariko apanakini, eereka hīteka hīxinika. Hōerekariko kākiti, hīxinireē hinirekiniri erekari hīkamini ikinimanemoni.” Ikara atoko poerekana.

³ Teoso aimarotini apisapanika miīkiteni atxaua. Kona akīpitari kākiti sākire, Teoso sākire apaka. Iuasaaki ate misirienetaāka. Iuasaaki akamari aīto nireēkitinoka. Ikini sereti maerekati akama apoxokoniuatini ĩkapani. Iuasaaki ikiniōtika axinikari maerekati akamini. !Apakata akamakiti. Kaxikorerini atxaua iuasaaki. Ate omanataāka. Apaka ate omanatari apanakini iuasaaki.

⁴ Ininiā eereka Teoso tiraōki, amaerekani makatxakakari tiraōki, iua amonīkare, apoka atemoni. ⁵ Ateka parīka erekari !imakatxakari amaerekani. Iua amonīkarenokara makatxakari amaerekani. Iuasaaki na atāo akama, iuaritika imakatxakari amaerekani, kotxi itiretaua. Iuasaaki iua arokari aākixinire. Itxīkitakaua ate aponaniini iuaīkana. Iuasaaki Erekari Matamatakoti kamari ikinika amaneri axinireē.

⁶ Teoso iōkanatari Erekari Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani.

⁷ Iua sikari ikinipoko erekari atemoni, ininiā ikamaerekataua. Ininiā itxīkitakaua Teoso anaakori aniniua, ininiā aāpakapariko ipotetakiti ate ĩkapani. Iua atoko ininiā, aiātapari ātipirika Teosokata aāuini ĩkapani. ⁸ Atāopitikara ia

nisāpiretakiti.

Ininiā ninirekari ātipirika pisāpiretiniri ikinika nisāpiretakiti Teoso sākire auiākanimoni. Ikara atoko Teoso auiākani itaparaxinireritika kamariko erekari apanakini ĩkapani. Kona maxikatīika ikamarina erekari. Teoso atāo ĩkitxitariko kākiti. Ikara atoko kākiti kaminiā, ininiā erekari ikinimane ĩkapani.

⁹ Kona pimaākatapiri miikiteti sākire. ! Hĭtaparakienatakapeua kitxakapirĭkarini uāka xika. Kona himaākatapenako kākiti kiomātxiakori oerekakiti xika tsoatakani. Ikara sākiretxiti ! itxĭkitakai erekari hininiua. !Itxa ĩkara sākiretxiti.

¹⁰ Kākiti oerekiniāri atāo minakati Teoso manirekakiniti, pōtākikari iua ipikata. Iposo atoko !pimaākataikari. ¹¹ Ikara atoko inakari atāo ĩkite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sāpiretakiti Mapotōkire

¹² Niokanatarī Atemasi inakori, atxiĭti Txĭkiko inakori apaka pitemoni. Ninoa apokasaaki, pa-iamata pisini ĩkapani, katimari notamoni Nikōpori sitatxitiā hāpokini ĩkapani. Ninirekari ia mitaāti nikaikotini iuaā.

¹³ Pimoianatarī Sena inakori, Aporo inakori pakini. Auĭtetxiakori paniātakiti imarotakari iua Sena. Pimoianatanako ninoa aiamatini. Iamoni-takitina pisikanako. ¹⁴ Aĭtariakori Xesosi sākire auiākani apaiaōkariko erekari ikaminina, kākiti minakati mauakiniti imoianatinina ĩkapani. Makamaretika hinini !apakata.

15 Notakata auakani xinikapikai pite. Pisãpiretanako ate tirketakani ereẽ Xesosi sãkire auiãkani nixinikamanapitana ninoa.

Ikinika erekari Teoso sikai hĩte hĩkinika. Ikara atoko niõkatsopata pitemoni. Ameẽ.

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022
253eaec7-f0c7-5b49-b6be-65ee5354d0ed